

قبل الحديث في هذا الموضوع أتقدم بخالص اعتذاري

عما سيتضمنه كلامي من عامية (مبتذلة جدا جدا)
ولكن الضرورات قد أباحت المحظورات

ملحوووووطة أي طالب يفهم نحو وشاطر فيه يرمى
الورقة دي من إيده لأنها مش ليه

ها لسه ماسك الورقة ؟!! يبقى أنت حد من اتنين

١- طالب شاطر وفضولك مخليك مكمل بيقلك تاتي ارميها
والله أنت أكبر من كده

٢- حبيبي اللي مقضيها طول السنة وجاي الأيام دي يلم نفسه
لقى النحو حوار كبير هيلبس في الحيطه

تعالى نشوف هنحلها ازاي

١- اول ماتيجي لقطعة النحو سيب القلم اللي في إيدك وامسك قلم

٢- وأنت بتقرأ القطعة حط دائرة حول الأفعال الموجودة بالقطعة

٣- نجى للإعراب بقى يامعلم

هتلاقى في الامتحان اربع كلمات تحتهم خط

** قيل ماعرب أي كلمة هحدها اسم ولا فعل ابوة أنا عارف أنك

ممكن تتلخبط هقولك ع الزتونة حط للكلمة (ال) ألف ولا م وأقراها

لو قبلت " ال " تبقى اسم ولا م قبلتش تبقى فعل

مثال يلعب الولد الكرة حط ال يلعب الولد الكرة منفعتش

امتحان النحو سهل الامتحان السهل نفعت يبقى اسم

يبقى من الآخر الاسم يقبل ال الفعل ميقبلش

٤- الكلمة اللي أنا عاوز أعربها طلعت فعل اعمل ايه:

احدد نوعه ماضى ولا مضارع ولا أمر طيب أعرف إزاي ؟!

حط قبل الفعل اللي قدامك " سوف " لو نفعت يبقى مضارع

منفعتش يبقى ماضى أو أمر

مثال يابرنس : يذهب الولد إلى المدرسة

حط سوف : سوف يذهب الولد إلى المدرسة نفعت صح ؟

!! يبقى مضارع

طيب عاوز مثال على اللي منفعتش

ذهب الولد إلى المدرسة نخط سوف

سوف ذهب الولد ... منفعتش يبقى ماضى أو أمر

لا حول ولا قوة إلا بالله بتقولى طب أنا عرفت المضارع

هعرف الماضى من الأمر ازاي هقولك اصحى للكلام

الماضى حاجة حصلت وخلصت والأمر حط ببطلب من

جد حاجة وينفع تحط للأمر ي مثل كل - كلى

تمام ؟!!!! عرفنا ازاي نحدد نوع الكلمة المطلوب

إعرابها اسم ولا فعل ولو فعل ماضى ولا مضارع

ولأمر

خلى بالك نسيت أقولك إنك بعد ماتحدد نوع الكلمة اسم

ولا فعل علشان تعرب لازم تبص قبلها اسم ولا فعل ولا

حرف

٥- نرجع تانى لو الكلمة طلعت فعل مضارع قبل ما أقول

فعل مضارع ماله هبص قبله على طول في ايه

قبله (أن - لن - كي حتى لام التعليل - لام الجحود -

فاء السببية) يبقى مضارع منصوب

قبله (لم - لا الناهية - لام الأمر - شرط) يبقى

مجزوم

مفيش قبله حاجة من اللي فات يبقى مرفوع

معلىش ياصاحبى أنا مطول في الفعل المضارع علشان

الكلام في المضارع " كلام كبار " عليه من اربع لست

درجات في الامتحان

** نرجع تانى عرفت المضارع مرفوع ولا منصوب

ولا مجزوم ؟!! قول آه عرفت هفلك الله ينور

فاضلك ياصاحبى تعرف مرفوع بايه ولا منصوب بأيه

ولا مجزوم بايه

الفعل	مرفوع	منصوب	مجزوم
صحيح	الضمة	الفتحة	السكون
معطل	الضمة	الفتحة	حذف حرف
الأخر	المقدرة	المقدرة	العلة
من	ثبوت	حذف	حذف النون
الأفعال الخمسة	النون	النون	

اصحى للكلام المعطل آخره (و - ا - ي) أهم حاجة عندي

ازاي اجزمه لأن السؤال ده هتلاقى لوحده بعد الاستخراج

مثلا يسمو بعد جزمه هيبقى : " يسم "

يسعى بعد جزمه هيبقى : " يسع "

يهدى بعد جزمه هيبقى : " يهد "

بس خلى بالك المعطل الأول مجزم بالسكون عادى زى

وقف بعد جزمه هيبقى : " وقف "

والأجوف مجزوم بالسكون عادى بس بحذف حرف العلة

لعدم التقاء ساكنين زى ينال بعد جزمه هيبقى : " ينل "

وأسف أنى بقول أجوف في الكلام

أجوف يعنى " حرف العلة جى في الوسط ياغالى "

طيب ايه الأفعال الخمسة

هى كل فعل مضارع وخلقى بالك مضارع بس

آخره " ون - ان - ين " يفعلون يفعلان تفعلين

في الرفع بخلقى النون زى يذهبون

في النصب والجزم بحذف النون زى

لن يذهبوا - لم يذهبوا

نسيت احنا كنا بنقول إيه احنا لسه في الإعراب بس طولنا

شوية في المضارع

عرفنا نوع الكلمة عن طريق ال اسم ولا فعل

٦- نجى بقى لو الكلمة اسم (نفعت معاها ال) قبل ما نعربها

نبص قبلها إيه اسم ولا فعل ولا حرف خلى بالك كنا متفقين

أن أى فعل هقابله في القطعة بحط عليه دايرة هينفعنى والله

* امشى قبل الكلمة من ناحية ايدك اليمين
**الكلمة اللي عاوز اعربها فيها اسم :-

احط قبل كلمتى (ايه) لو كلمتى وضحت المعنى تبقى
مضاف إليه مجرور مثال محمد أفضل رجل
هقول محمد أفضل إيه هلاقى الإجابة أفضل رجل
يبقى " إيه " بتجيب المضاف إليه
طيب مش جايبه معاك ::

اشوف الكلمة بتاعتي فيها الـ ولا من غير الـ
واشوف الكلمة اللي قبلها لو طلعت زيتها بالـ أو من غير الـ
وكلمتى بتوصفها " وينفع تتحذف من الكلام " يبقى نعت
يامحترم وياخذ اعراب اللي قبلها
وخلى بالك نكرة + **معرفة** مضاف إليه
* **جربت كلامك يامستر ومش نافع هقولك :**

كمل مشى ناحية اليمين وحاول تشوف فاصلة ، أو نقطة
معنى الكلام إن الجملة بعدهم جديدة اشوف أول كلمة بعد
النقطة أو الفاصلة إيه لو اسم: " الاسم فى أول الكلام مبتدأ
" ولازمه خبر

طب ماتجرب تحط بعد الاسم ده كلمة " ماله " ودور على
إجابة ماله هتلاقى نفسك عمال تقول ماله لحد ماتلاقى كلمتك
الى بتعربها هى الخبر **والخبر مرفوع** ولو كان واخواتها
منصوب

طيب لقيت أول الجملة **فعل** : احط قبل الفعل
" مين - ماذا - كيف - لماذا "

واشوف كلمتى اللي بعربها طلعت إجابة لأنهى اداة
لو كانت إجابة لـ مين : تبقى " **فاعل** "

لو ماذا : تبقى **مفعول به** لو لماذا : **مفعول لأجله**
لو كيف : **حال** كلمتى نكرة وفيها شبه من الفعل تبقى:

مفعول مطلق

طيب الكلمة بتاعتي قبلها إن واخواتها تبقى اسمها وجيب
الخبر بتاعها بكلمة " ماله " برضو
الكلمة بتاعتي نكرة وقبلها لا **نافية للجنس** تبقى اسمها
قبلها كان واخواتها تبقى اسمها أو خبرها

خلى بالك اسم إن منصوب وخبرها مرفوع والعكس مع
كان واخواتها

الكلمة بتاعتي قبلها (**كاد - أو شك - عسى - بدأ - شرع**)
وبعدها فعل مضارع أو أن وفعل مضارع تبقى كلمتى اسم
مرفوع للأفعال دى
طيب وأنا ماشى ناحية اليمين قابلنى **جار ومجرور** أشوف
الكلمة بتاعتي ينفع تيجى قبله علشان ممكن تكون مبتدأ
مؤخر أو اسم لناسخ مؤخر
أصحى للى جاي

اسم إشارة + اسم معرف بال بدل
* أى اسم بعد (هنا - هناك - ثمة - بخاصة - هذا)
يعرب **مبتدأ مؤخر**

* أى اسم بعد خصوصاً وخاصة يعرب **مفعول به**
الاسم بعد أيها أيها يعرب نعت مرفوع أو بدل

* أول نكرة منصوبة بعد أفعل التفضيل تعرب تمييز
* **نفس - عين - كل - جميع - كلا - كلتا** + ضمير
متصل وينفع احذفها من الجملة تعرب توكيد معنوى

* أى اسم بعد (كل - بعض - غير - سوى - جميع - كلا
- كلتا - الظروف) يعرب مضاف إليه

* الاسم بعد ما أفعل **مفعول به** مثل ما أجمل السماء

* الاسم بعد أفعل بـ يعرب **فاعل** أجمل بالسماء

* **الكلمات (جيداً - سريعاً - حثيثاً - كثيراً - طويلاً - جداً)**
تعرب: نائباً عن **المفعول المطلق**

فعل = (كل - بعض - اسم إشارة) + مصدر الفعل

الكلمات دى تعرب نائب عن **المفعول المطلق**
* الاسم بعد (لولا) يعرب مبتدأ حذف خبره

* إذا جاءت (ما) بعد (أن) توقف عملها ومابعدا مبتدأ

* **الأفعال** وهب أعطى منح البس ظن حسب .. بعدها

مفعولين وغالبا يبقى المفعول الأول ضمير متصل

* ضمير منفصل زى (هو - هى هم ..) + اسم الاسم ده

هيعرب **خبر**

* خلى بال سيادتك _ الاسم النكرة لما بيتصل بيه ضمير
مبقاش نكرة خلاص يعنى لو جاء بعده اسم معرف بالـ
هتعربه **نعت** زى : " خطه الواضح " نعت
* **اصحى لى (أى دولة أى اسم بنت كل اسماء الأنبياء**
ماعدنا محمد ، صالح ، شعيب) لو جت مجرورة
هنجرها بالفتحة علشان ممنوعة من الصرف

دى كانت محاولة منى أنى أجمع
معظم الإعرابات فى نقاط بسيطة
وبعتذر مرة أخرى عن الكلام
بالعامية أراكم مع الاستخراج

صدقة جارية على روح أختي
المرحومة

أم رفايدة

أ/ أحمد بيومى السقا

٠١٢٧٣٣٨٣٣٦٥ / ٠١٢٧٨٤٩٠٠٤٢

<https://www.facebook.com/MrAhmedElsakka>

<https://twitter.com/manoelsaka82>